

rini di l'armada. Come è molti corsari sul mar, qual fanno danno, si trovano cossa di valuta etc. *Item*, se intese ditto provedador era partito de li con 5 galie, inteso la nova di Cerigo, di la nave presa di sier Mathio di Prioli etc., per passar verso Cecilia per trovar ditto corsaro.

155* *Di Cerigo, di sier Zuan Francesco Gradenigo, provedador.* Narra il successo dil prender di la nave dil Prioli, andava a Constantinopoli, da do barze di corsari, *videlicet* de, qual dete l'incalzo a la nave di Coresi, che si salvò li im porto.

Fu posto, per li savij, certo ordine, et scritto al provedador di l'armada, trovando corsari sul mar, quello l'habi a far, *videlicet* non havendo fato danni a' nostri, li debino disarmar.

Fu posto varie opinion di armar, per li corsari, atento il caso sequito: *videlicet* sier Andrea Venier, savio dil consejo, messe armar una galia sotil: li altri savij dil consejo et terra ferma, insieme con li consieri, armar do nave; sier Vincenzo Michiel, sier Francesco Griti, savij ai ordeni, armar do galie bastarde, a questo sollo effecto di perseguitar li corsari. Et fo disputato: parlò sier Andrea Venier, sier Alvise Soranzo, è di pregadi, qual non voleva le galie bastarde, vogano 4 remi per bancho, ma quelle da 3 remi, ch'è in l'arsenal; poi parlò sier Hironimo Capello, e aricordò le galie bastarde; e cussi li savij ai ordeni messeno la parte; et questa fu presa.

Fu posto, per li savij, per trovar danari di armar queste do galie, tutti li debitori dil 3.º di dacij, X officij, decime di merchadantie, debino pagar la 1/2 a mezo questo mexe, et l'altra mità a mezo l'altro, e li danari siano ubligati a l'armar di queste do galie; e fu presa e publicata.

Fu scritto al provedador di l'armada, mandi il suo secretario a Rodi, per la recuperation di danni fati, *videlicet* che 'l turco à voluto nostri pagi danni li ha fato rodiani, *ut in litteris*.

Fu posto, per li savij dil consejo et tera ferma, do capitoli in risposta di oratori faventini, *videlicet* zereha i vichariadi et le apellation di le cosse fiscal, *ut in eis*; et fu prese.

A dì 12. Da poi disnar la Signoria dete audientia et li savij. Fo letere da Corfù, di 2, come la nave zenoesa, voleva levar mori, il provedador di l'armà li tolse il timon in terra. *Item*, fino a quel di le galie dil trafego non erano zonte; et il provedador con 5 galie era partito per seguir il corsaro.

A dì 13. Fo consejo di X con zonta.

A dì 14. Fo pregadi, per l'avogaria, et parlò sier Zorzi Pixani, dottor, cavalier, *olim* avogador,

qual, insieme con li altri, intromesseno il consejo, che li patroni de Flandra fennio fati cazer a la prova, contra le leze, et messeno di tajar quelle parte *consecutis* etc. Ave 121 de sì, 26 di no, 6 non sinceri; stetenno pocho suso, nè altro fu fato.

A dì 15. Fo consejo di X con zonta.

A dì 16. Fo pregadi. Et leto le infrascripte letere:

Di Roma. Come il papa era ritornato di Hostia, dove andò a star a piacer 8 zorni, et era ritornato con galie per mar. *Item*, zereha il vescoo di Cremona, par il cardinal Lisbona si habbi interposto a voler conzar la cossa tra la nostra Signoria et il papa; et che 'l cardinal San Zorzi si à dolto col nostro orator di Meleagro da Forli, condutier nostro, che ha damnizato su quel di Forli a soi nepoti aspectanti etc. 156

Da Napoli, di Lunardo Anselmi, consolo. Dil zonser li di domino Piero Grimani, cavalier jerosolimitano, et fradello dil cardinal Grimani, patrio veneto, qual visitò la raina di Hongaria, fo molto acharezato, et spesso da lei appresentato. *Item*, poi visitò il gran capitano, vice (*re*), dal qual fo assai honorato; et era giõto lo agente di esso gran capetano, stato in Spagna, con mandato, *omnino* il gran capitano vadi in Spagna, non obstante il dubito di turchi.

Di Ferara, di sier Sabastian Zustignan, el cavalier, vicedomino nostro. Zereha il zonser li dil ducha, qual partì per andar in Spagna, ma non partì di rezana, perchè have letere di Spagna non andasse, sì che ritornò con la compagnia a Ferara, par poi habi auto altro ordine, e di Franza passo, e di Spagna vadi.

Di Hongaria, dil secretario nostro. Come qual re à posto hordine di abocharsi, insieme con il re di romani, in uno locho, nominato per, per far la conclusion dil matrimonio di soa fiola nel 2.º genito dil re di Chastilia; e questo re di Hongaria va contra il voler di baronia a questa abochation. *Item*, par il turchi voi fabrichar a Smedro, qual per la saita che dete fo ruinato; *etiam* vol far una forteza a l'incontro di Jaiza, le qual cosse dispiace al re.

Di Elemania, date Come il re è implicito zereha le cosse di Hongaria, et atende expugnar certo loco, tenuto per il conte Bernardin Frangipani, fo dil conte di Sil, qual par sia di la caxa di Austria, et sedate quelle cosse, vol *omnino* venir in Italia, et risponderà a la Signoria. *Item*, l'orator si duol di quella legation molto laboriosa, è come corier.